

EBERUNO

Kirisi de malaikanɔla 1:1-2:18

Kirisi de Musala 3:1-4:13

Kirisi de Haruna buri sa'orinɔla 4:14-7:28

Kirisi sa'orikena deŋla 8:1-10:39

Ò Luda náani ke 11:1-12:25

Lédammanaa 13:1-13:25

Luda Né de malaikanɔla

¹ Luda yā ò ó dizinɔne yā káaku annabinɔ gāi gènn baaakɔ zénɔ gūn dasi,

² ama à yā òwɛɛ a Né gāi gɔɔ kɛde díkīnanɔn sà. Né pì gāin Luda andunia kèò, à dìte kū àkū mé anigɔ pò sīnda pínki vī.

³ Àkū mé à Luda gakuri tékena ũ, à de a kunna ũ sānsān. Àkū mé à pò sīnda pínki kūna kū a yā'ona gbānao. Durunnanɔ kēmmana gbera à vùte musu Luda zɔkɔde ɔplai.

⁴ Lákū tó kū à blèe pì de malaikanɔ póla nà, len a zɔkɔ deŋla le.

⁵ Luda yā dí ò malaika kenɛ yā yá?

Ma Néme n ũ, ma n i gbāra,

Kesɔ:

Manigɔ de a De ũ,

anigɔ de ma Né ũ.

⁶ Kū Luda tò a dauduu sù andunia gūn à pì:

A malaikanɔ donyī kenɛ ní pínki.

⁷ Malaikanɔ yā musu à pì:

Adì a zīrinɔ lí ãa ũ,

a zīkerinɔ sō tévura ũ.

⁸ A Né yā musu sō à pì:

Luda, ñinigɔ vutena kíblegbaaa gɔɔ sīnda pínkime,

ndìgõ n kíkεgo kũna yāzεde ũ.

⁹ N̄ ye yāmanakεnaai, n zā vānikεna gu.

Abire yāi Luda, n Luda, n ka kín,

à p̄onna p̄issimma de n gbēn̄ola.

¹⁰ Ò p̄i d̄o:

Dikiri, n andunia z̄ini p̄εte zaa káaku,

musu bi n ɔz̄ime.

¹¹ N̄ p̄ínki ni ḡεte, ama ñnigõ kun.

Oni z̄i kũ lán pókasa bà,

¹² ñni n̄ koko lán uta bà,

ñni n̄ lite lán pókasa bà.

M̄ok̄õn s̄õ, n kuuna ðigõ dok̄õn̄o,

n ḡōro lakana v̄iro.

¹³ À yā dí ò malaika kenε yā yá?

N̄ vute ma ɔplai

ari màgõ n ìberεn̄o kenne n tintin ũ.

¹⁴ Malaikan̄o bi nini z̄ikerin̄ome n̄ p̄ínki. Luda ði n̄

z̄i de ò kpá gb̄ε kũ oni surabana len̄ime.

2

Surabana z̄õk̄õ

¹ Abire yāi ò yāpura kũ o mà kũ ɔplapla ḡinḡin,
de òsun k̄ε z̄éaro yāi.

² Zaakũ yā kũ Luda ðite malaikan̄o ḡai bi
tilasime, akũ ò f̄inaa bò gb̄ε kũ ò ḡi mai ò p̄an̄en̄one
a z̄éa,

³ tó ódi surabana z̄õk̄õ p̄i yā da s̄õro, óni bo yá?
Surabana yā p̄i bò Dikiri k̄inaame, akũ gb̄ε kũ ò
m̄an̄o yāpura kp̄aawεε.

⁴ Luda èra à yāpura kp̄a yā p̄iia kũ s̄èdan̄o kũ
yābonsaren̄o kũ daboyã dasi kenan̄o kũ a Nini gba
kũ à kp̄ateteñ̄en̄o a p̄oyenȳinaaa.

Yesu gōna bisāsiri ū lán ó bà

⁵ Adi ke malaikanon Luda andunia zia kũ óteni a yā o nàíne n̄ ɔíro.

⁶ À kũ Luda yān gukea ò pì:

Bón bisāsiri ū kũ a yā ògō ònguu?

Bón a ū kũ ndi laakari òaa?

⁷ N a kè kīana malaikanɔi féte,
n a kà kpatan kũ gakurio kũ bèereεo,

⁸ n tò pó sīnda pínki m̀i nàtenε.

Kũ Luda tò pó sīnda pínki m̀i nàtenε, adi a ke tó minatenanε sariro. Tera lán dí bà, ódi e kũ pó sīnda pínki m̀i nàtenε gĩaro,

⁹ ama o è kũ Yesun ò téa. Luda a kĩa malaikanɔi ari gɔɔ pla, de Luda gbẽke gũn à ga gbẽ sīnda pínki gẽne ū, akũ à a kà kpatan kũ gakurio kũ bèereεo ga wari kũ à kè yāi.

¹⁰ Lákũ pó sīnda pínki bò Luda kīnaa nà, akūsō pó sīnda pínki de a pó ū, kũ à ye à gẽ kũ gbẽno dasi a gakuri gũn a n̄n̄ ū, à k̄s̄ s̄i k̄ao à gbẽ kũ à surabana zé bónnε papa warikεnaa gũn.

¹¹ Gbẽ kũ ò ḡō Luda gbẽno ū kũ gbẽ kũ àdi n̄ ke Luda gbẽno ūo, n̄ pínki de dok̄on̄mε. Abire yāi n̄ s̄isina a gbẽno ū ò a wé'i kũro.

¹² À pì:

Mani n tó bo ma gbẽno té,

mani n sáabu kpá k̄kakaranaa gũn.

¹³ À pì ò:

Mani a náani ke.

À pì ò:

Makũmε la kũ né kũ Luda kpàmanɔ.

14 Zaakū né pìno bi bisāsirinome, akāa se à gǝ bisāsiri ũ lán n̄ bà, de à ga à Ibilisi kũ àdi su kũ gao kakate,

15 à gbē kũ òten vīna ke ganē òten zò ble ari n̄ wèndi lénno bo.

16 Yāpura gūn malaikanon àten o darūmaro, Ibrahī burinome.

17 À kō sio à gǝ lán a dakūnanao bà yā sīnda pínki gūn, de à gǝ Sa'oriki sùrude nāanide ũ Luda zī gūn, gbēno durunna kútekebo ũ do.

18 Lákū à wari kè à yōogwanaa f̄ nà, ani f̄ à gbē kũ òteni n̄ yō ò n̄ gwano faaba ke.

3

Yesu de Musala

1 Abire yāi ma gbēno, akōno kũ Luda á sísi a su a kīnaano, à laasun lé Yesu kũ Luda a zī Sa'oriki kũ o zεo ũa.

2 Nāanideme Luda kũ à a dītene lákū Musa de nà Luda onn.

3 Lákū onkaterii bèereε dīgǝ de onla nà, len Yesu gakuri zōkǝ de Musa póla le.

4 On sīnda pínki a kàteri vī, akūsō pó sīnda pínki Kàterin Luda ũ.

5 Luda on zīkeri nāaniden Musa ũ, yā kũ Luda ni o sèedademe.

6 Kirisi sō bedē pì néme. Luda a on nàne a oī. Ókōnōme on pì ũ, tó ó kpé óten tāmaa kũ ó vī lé gbē kũ kù gbānao.

Luda gbēno kámmaboki

7 Abire yāi lákū Luda Nini ò nà:
Tó a Luda kòtoo mà gbāra,

8 àsun sāgbāna ke lákū á dizino kè nàro,

kū ò ma ɛ ò ma gwa ɔɔ kũ ò bò ma kpɛ gbárannan.

⁹ Bee kū ò ma yákenanɔ è wè bupla,
ò ma ɛ ò ma gwa gwe, ò ma gbãna lé gwà.

¹⁰ Akũ ma pɔ fè gbè pìnɔi,
ma pì gbè sāsānanɔ me n̄ ũ,
odi ma zénɔ dōro.

¹¹ Akũ ma la dà ma pɔfè gūn ma pì,
oni gè ma kámmabokinlo fá.

¹² Ma gbēnɔ, à laakari ke á gbēke súngō swè
vāni ludanaanikenasari vī ari à gé kēo Luda
Wèndidearo.

¹³ Gu kū àdi dɔ kū àdi pi Gbāra pínki, àgō lé dakōa,
de durunna sún á gbēke sātɛ à sāgbāna kũro yāi.

¹⁴ Zaakũ Kirisi gbēnɔn ó ũ, tó ó náani kū ó vī zaa
káaku kũna gbānagbāna ari a léa.

¹⁵ Lákũ ò ò nà:
Tó a a kòtoo mà gbāra,
àsun sāgbāna ke lákũ á dizinɔ kè nà
ɔɔ kũ ò bò ma kpɛro.

¹⁶ Dínɔn gbè kũ ò Luda kòtoo màa ò bò a kpɛnɔ ũ,
tó adi ke gbè kũ Musa n̄ bóte Misilanɔ baasiroo?

¹⁷ Dínɔn Luda pɔ fènyĩ ari wè bupla, tó adi ke gbè
kũ ò durunna kè, n̄ gèe gò katena gbáranna gūnnɔ
baasiroo?

¹⁸ Dínɔn à la dàinne kū oni gè a kámmabokinlo, tó
adi ke gbè kũ ò gi a yā mainɔ baasiroo?

¹⁹ O è kũ odi le ò gènlɔ n̄ ludanaanikenasari yāi.

4

¹ Zaakũ gēna kámmabokin kũ Luda a lé sè kpé kun,
ò laakari ke, de ó gbēke sún kurairo.

² Zaakū o baaru nna mà lán ní bàme, ama yā kū ò màa pìi àrè vīńnero, kū odi ma kū ludaanikenaaoro yāi.

³ Ókōnō kū o yā pìi sìnō, odì gē kámmaboki pìn. Mókōnō s̄s̄ Luda pì:

Ma la dà kū pɔf̄eō ma pì,
oni gē ma kámmabokinlo,

À yā bire ò bee kū à a zī m̀i dè zaa anduniakatena gɔrɔ,

⁴ zaakū ò gɔrɔ supplade yā ò Luda yān gukea ò pì,
gɔrɔ supplade zī Luda kámma bò kū zī kū à k̀eēo pínki.

⁵ O mà tera à pì, oni gē a kámmabokinlo.

⁶ Zaakū gbē kū ò baaru nna pìi mà zaa káakunō dí gēnlo, kū odi síro yāi, akū a gēnaa g̀g̀ gbē pāndenōne.

⁷ Akū Luda èra à gɔrɔ ke d̀t̀e d̀o òdi pì Gbāra, abire gbera a g̀i k̀e akū à Dauda gbà lé, à ò lákū ò ò nà tera:

Tó a a k̀otoo mà gbāra,
àsun s̄agbāna kero.

⁸ Tó Ỳsua g̀e k̀ūńwo kámmaboki pìn yā, de Luda dí gɔrɔ pānde yā o kpekpero.

⁹ Akū mé à tò kámmaboki g̀g̀ Luda gbēnō pó ũ.

¹⁰ Zaakū gbē kū à g̀e Luda kámmabokin kámma bò kū a zīome, lákū Luda kámma bò kū a zīo nà.

¹¹ Tó leme, ò wé t̄a ò g̀e kámmaboki pìn, de ó gbēke sún g̀i Luda yā mai, à fu lán ní bàro yāi.

¹² Luda yā bēne, akūs̄s̄ à gbāna, a lé nna de f̄ēnda kpa plaplala. Àdi ní z̄s̄ à g̀e ǹeēē g̀n ari ninin, àdi g̀e m̀ep̄ep̄ekerekin ari wá b̀or̄oḡon, àdi laasun kū ǹeēē yāo gwagwa.

13 Luda pókèna ke utenanero, a ke kpáne guiro. Luda kũ óni ó yāno sète ò one dì pò sīnda pínki e ari a bia.

Yesu de sa'orikinola

14 Zaakũ ó sa'oriki zókõ kũ ludambε wèkõa ari Luda kīnaa vī Luda Né Yesu ũ, ògõ zé kũ o sè yā kūna gíngin.

15 Zaakũ ó sa'oriki vī kũ ani f̄s à ó wēnda d̄s ó gbānasarikε gūn. Ò a ȳò ò gwà lán ó bà yā sīnda pínki gūn, adi durunna kero.

16 Abire yāi ò na Luda Gbēkεkεnneri kίblegbaai kũ swēεo kpatena, de à ó wé gwa à gbēkε kεwεre a gɔɔa.

5

1 Òdi sa'oriki sīnda pínki sé gbēno téme, òdi a dite n̄ wéde ũ Luda kīnaa, àgõ gba kpáa, àgõ a gbagbañne n̄ durunnao yāi.

2 Ani f̄s à ke kũ gbē kũ ò s̄ate n̄ d̄nasarikε gūnnoo busebuse, zaakũ àpii kú kũ gbānasarikεome se.

3 Abire yāi séde à sa o a zīda durunna yā musu, lākū àdi o gbē kparano pò musu nà d̄o.

4 Gbēke dì a zīda ká kpataa p̄i gūnlo. Luda mé àdi a ká, lākū à Haruna kàn nà.

5 Len se Kirisi dí a zīda ká sa'oriki kpataa gūnlo, Luda mé à a kàn à p̄i:

Ma Némε n ũ,
gbāran ma n i.

6 À p̄i Luda yān gukea d̄o:

Īnigõ de sa'ori ũ gɔɔo sīnda pínki lán Melekizεδeki bà.

⁷ Goro kũ Yesu kũ andunia gũn à adua kè kũ wiki gbãnao kũ wé'io, à kúte kè Luda kũ ani f̄s̄ à a sí gaaane, akũ Luda a yã mà, kũ àdi a yã da yã.

⁸ Bee kũ a Ludanek̄eo, à mìnaten̄a Ludan̄e d̄ada a wariken̄aa gũn.

⁹⁻¹⁰ Kũ mana pèker̄ea à làka, Luda a kà sa'oriki ũ lán Mel̄ekiz̄ed̄eki bà, akũ à ḡò surabana kũ àdi lákaro boki ũ gb̄e kũ òdi a yã man̄one ñ pínki.

Laakarik̄ena funaai

¹¹ Yã bire musu ó yã v̄i dasi ò oáre, ama a bok̄ot̄ena z̄i'ũme, zaakũ adì yã d̄oro d̄s̄ likaro.

¹² Ák̄õn̄o kũ a ḡi kèn lán dí bà, à mana àḡõ de yādannerin̄o ũme, ama ari tera á kpé kũ ò era ò Luda yã kũ òdi dada gb̄e dufun̄one daáre d̄o. Ȳs̄'i mé à k̄s̄ si k̄áo, adi ká à yũku p̄s̄ blero.

¹³ Zaakũ ȳsmiri s̄inda pínki bi néme, adi ká à ɔze d̄sk̄õne kũ ɔplaoro.

¹⁴ Yũku s̄s̄, gb̄e kàsara kũ ò d̄õne k̄eono p̄õme. Ò a mana d̄õna k̄õne kũ a v̄anioo d̄ada.

6

¹ Abire yã ò Kirisi yādann̄ena káakup̄on̄o kpá kpe, ò gé are ari ò ḡõ gb̄e p̄eker̄enan̄o ũ. Adi ke òni era òḡõ yātákp̄atena d̄in̄o gb̄e sísi d̄onlo: Kpelina yã ḡen̄one, ludanaanik̄enaa,

² da'ite yādadanaa, ɔnammana, ḡen̄o vuna ke zia yákp̄atekenaa.

³ Tó Luda wè, òni yã biren̄o kpá kpado ò gé are.

⁴ Zaakũ tó gb̄e wé k̄è, à Luda gba lè, a baka kũ Luda Nini gũmme,

⁵ tó à Luda yã kũ andunia kũ àten su gbãnao í kè, à a nna d̄s̄

⁶ tó à fùà, zé kun kũ à era à nèse lite doro, zaakũ àten Luda Né pá lía dɔme, àten wé'i daa gupuraame.

⁷ Tó legũ ten ma zĩte gèn baaakõ àten mɔto le, akũ à pó kũ à àre vĩ búbarinɔne bũte, Luda dì arubarika dan.

⁸ Tó à lè kũ lèkaraaoo bũte sõ, à ginaame, à zà kũ lèkennenaao. Ani mì de kũ téome.

⁹ Àkɔnɔ sõ ma gbẽ yenyĩdenɔ, bee kũ o ò le, ó laakari kpatena á yã musu kũ á kú kũ yã mana kũ ò bò surabana zé gũnnɔ.

¹⁰ Luda dì yã ke a zéa, á yãkenanɔ kũ yenyĩ kũ á vĩ kãaoo ni sãaguro, zaakũ a kpányĩ kè a gbẽnɔne, akúsõ á kpé áten ke.

¹¹ Ó ye á baadi gõ ania vĩ le ari a léa, de ásun sika ke pó kũ á wé dɔi yã musuro.

¹² Ásun ma'ã keró. À gbẽ kũ òten Luda náani ke kũ menao òten pó kũ Luda a lé sè lenɔ ágba sé.

Lé kũ Luda sè sika vĩro

¹³ Gɔrɔ kũ Luda ten lé sé Ibrahĩne, kũ gbẽke kun deala à sí kãaoro, a yãin à sì kũ a kunnaao

¹⁴ à pìne, áni arubarika daagu yãpura à tó a buri karane.

¹⁵ Ibrahĩ mena fõ, akũ à pó kũ Luda a lé sènɛɛ lè.

¹⁶ Òdi la da kũ gbẽ kũ à deńla tóome. Ladana mé àdi tó ò yã yãpura dõ, akúsõ àdi lékpakõana kèkõañne.

¹⁷ Luda ye à mó gbẽ kũ a lésena ni gõ ní pó ùnɔne swáswa kũ a lé litena vĩro, akũ à sì kũ a kunnaao.

¹⁸ Lemé yã mèn pla kun kũ à litena vĩro, Luda ni fõ à éke to a musuro. Yã pìnɔ teni ókɔnɔ kũ o nainɔ gba swè manamana, de ò tãmaa kũ ó wé dɔi ke sikaa sari.

19 Ó tãmaa bire vī ó wèndibadɔɔ ũ. À náani vī, akūsɔ à gbãna, àdi gẽ kũoo Luda kúkia lábure kpɛ,

20 gu kũ Yesu gĩnake à gèn ó yāi, à gò sa'oriki ũ ari gɔɔ sīnda pínki lán Mɛlekizɛɔeki bà.

7

Sa'oriki Mɛlekizɛɔeki

1 Mɛlekizɛɔekime Salɛmu kína ũ yā, Luda Musude sa'oriime. Gɔɔ kũ Ibrahĩ zĩ blè kínanɔa àten su, akũ Mɛlekizɛɔeki gèe à dàale, à sa mana òne,

2 akũ Ibrahĩ aruzeke kũ àten suo pínki kuride kpàa. Mɛlekizɛɔeki tó pìi pì, yāzede kína. Abire gbɛra Salɛmu kína bire pì, aafia kína.

3 À de kũ dao kũ dizinɔ vīro, a wèndi naana ke midena vīro. À bò lán Luda Né bàme, sa'oriin a ũ gɔɔ sīnda pínki.

4 À gwa lákũ à zókɔ nà. Ó dizi káaku Ibrahĩ aruzeke kũ à sète zĩlan kuride kpàa.

5 Musa doka dìte Levi buri kũ ò de sa'ori ũnɔne, ò pò kuride sí n̄ Isaraila dakenɔa, bee kũ n̄ Ibrahĩ burikɛo.

6 Mɛlekizɛɔeki bi Levi burinlo. Bee kũ abireo à Ibrahĩ pónɔ kuride si, à sa mana ò Ibrahĩ kũ Luda lé s̄nɛɛne.

7 Sikaa sari gbẽ kũ à sa mana ò gbẽne zókɔ de gbẽ kũ à sa mana ònela.

8 Sa'ori kũ òdi pò kuride sí pìnɔ bi gbẽ kũ òdi ganɔme. Mɛlekizɛɔeki s̄o, gbẽ kũ ò pì àdigò kun gɔɔ sīnda pínkin a ũ.

9-10 Gɔɔ kũ Mɛlekizɛɔeki gèe à dà Ibrahĩle, odi Levi i kòro, à kú a dizi de Ibrahĩ wógbamme. Abire

yāi oni f̄s̄ ò pi sé, ḡr̄o kũ Ibrahĩ p̄s̄ kuride p̄i kpà,
Levi buri kũ òdi p̄s̄ kuride kpámman̄o mé ò kpà.

Yesu de lán Melekizedeeki bà

¹¹ Levi buri sa'orii p̄in̄ome doka kũ Musa kpà Isarailan̄o z̄ini ũ. Tó oni f̄s̄ ò tó gb̄en̄o ḡs̄ papana, oniḡs̄ sa'ori p̄ānde ni v̄i lán Melekizedeeki bà doro, sé Haruna buri sa'ori ḡāa.

¹² Tó sa'orin̄o lit̄e, séde doka lit̄e.

¹³ Gb̄e kũ ò yā biren̄o ò a musu bi Isaraila buri kũ a gb̄eke dí sa'ona z̄i ke zikirome.

¹⁴ Zaakũ ó d̄s̄ s̄āns̄ān kũ ó Dikiri bò Yuda buri ḡūmm̄e. Ódi ma kũ Musa sa'ona yā ò buri p̄i musuro.

¹⁵ Yā kũ yā p̄i wé bòn dí: Sa'ori p̄ānde bò lán Melekizedeeki bà.

¹⁶ A ḡōna sa'ori ũ bi doka ke burike yānlo. A w̄ēndi kũ àdi lákaro gb̄āna yāime.

¹⁷ Zaakũ ò p̄i:

Īniḡs̄ de sa'ori ũ ḡr̄o s̄īnda p̄ínki Melekizedeeki ḡān.

¹⁸ Ò doka kũ à kun yā p̄i kpà kpado, kũ à gb̄ānaro, akūs̄s̄ à kun p̄óke ũro.

¹⁹ Zaakũ doka p̄i dí tó gb̄eke ḡs̄ papanaro. Akũ tāmaa kũ à s̄āna zé b̄ower̄e, kũ o nao Ludai.

²⁰ Abire ḡbera Luda dí abirekũ ke ladanaa sariro. Gb̄e kparan̄o ḡs̄ sa'orin̄o ũ ladanaa sarime,

²¹ ama Yesu ḡs̄ sa'ori ũ kũ ladanaao, kũ Luda p̄ine:

Dikiri la dà ani lé sukparo,

à p̄i aniḡs̄ de sa'ori ũ ḡr̄o s̄īnda p̄ínki.

²² Ladanaa p̄i yāi Yesume zenkpeke ũ kũ Luda bàka kunna kũn̄wo dufu de a z̄ila.

²³ Abire gbera sa'orinon dasi yā, zaakū ga di tó ògō kú n zī gūn goro sīnda pínkiro.

²⁴ Ama kū Yesu kun goro sīnda pínki yāi, a sa'orikēnaa gēnēblena vīro.

²⁵ Abire yāi ani fō à gbē kū òdi na Ludai kū a gbānaonɔ sura ba māmamm, zaakū à kun goro sīnda pínki de àgō kúte keńne Ludane.

²⁶ Sa'oriki bire taka mé à kō sī kūoo. A kunna adona. À yā vāni ke gbāsī vīro. Luda a kēkōa kū durunnakerinɔ, à a sè à tào musu ari a kīnaa.

²⁷ A bàka kú kū sa'ona lākū gu diğō dɔ nàò lán sa'oriki kparanɔ bàro. Gbē pinɔ di sa o n zīda durunnanɔ yāi kū n gbēnɔ pónɔ dɔ. Àkāa sō, à ò gēn dome, kū à a zīda kpà.

²⁸ Musa doka di gbēnɔ ká sa'orikinɔ ũ n gbānasarike gūmmē, ama kū Luda sī kū a kunnaao doka pì ditēnaa gbera, akū à a Né kū à gō papana ari goro sīnda pínki kàn.

8

Yesumē ó Sa'oriki ũ

¹ Yā kū òten o mìn dí: Ó sa'oriki bire taka vī vutena kíblegbaaa musu Luda zōkōde oplai.

² Àdi zī ke Ludakukia, bizakuta yāpura kū Dikiri dòn, adi ke pó kū bisāsirinɔ dònlo.

³ Zaakū suna kū gbanɔ kū sa'onaaao yāin òdi sa'oriki sīnda pínki kái, à mana àpii gō pó vī à kpá se.

⁴ Tó à kú andunia gūn, anigō de sa'ori ũro, zaakū sa'ori kū òdi su kū gbanɔ lākū doka dìte nàno kun kò.

⁵ Zī kū òten ke bi pó kū à kú musu takamē, a ninimē. Abire yāi kū Musa ye à bizakuta dɔ, Luda

pìne à laakari ke à p'ó kũ a a taka m'òne kpi musu ke l'ákũ à de n'á pínki.

⁶ Yesu mé à Luda bàka kunna kũoo y'ákekeri ũ. Zaakũ Luda bàka kunna kũooo pì de a bàka kunna kũńwo zĩla, zĩ kũ ò d'áne de sa'oriki p'ìn'ò p'óla. Luda bàka kunna kũooo p'ì l'ésena de a zĩla d'ò.

⁷ T'ó Luda bàka kunna kũńwo zĩ p'ì papaname y'á, de a plade z'é v'ĩro.

⁸ Kũ Dikiri Isarailan'ò taari l'è à p'ì:

A g'or'ò ten su kũ mani ma bàka kunna kũ Isarailan'ò kũ Yudan'ò dufu ke.

⁹ Anig'ò de lán ma bàka kunna kũ n'á dizin'ò g'or'ò kũ ma n'á kũ n'á òa ma n'á b'óte Misila bàro. Zaakũ odi ze kũ ma bàka kunna kũńwooro, akũ ma n'á tón.

¹⁰ Ma bàka kunna kũ Isarailan'ò g'or'ò biren'ò g'bera y'án dí:

Mani ma dokay'án'ò da'áne n'á n'ésen,

mani k'è n'á sw'è'ea.

Manig'ò de n'á Luda ũ,

onig'ò de ma gb'èn'ò ũ.

¹¹ N'á gb'èke ni y'á dada a daken'ero,

n'á gb'èke ni ma d'óna da a gb'èn'ero,

zaakũ n'á pínki nig'ò ma d'òme,

n'é f'iti gb'è z'òk'ò n'á pínki.

¹² Mani s'uru ke kũńwo kũ n'á taarin'ò,

mani n'á durunna'ò y'á da doro.

¹³ Kũ Luda bàka kunna kũńwo dufu p'ì y'á ò, à a k'áakup'ò z'ì b'ò. P'ó kũ à z'ì k'ù à b'ùsa, a k'pana gui z'áro.

9

Luda bàka kunna kũńwo z'ì sa'onaa

¹ Luda bàka kunna kũńwo káaku donyĩ zé vĩ kũ Ludakuki kũ à kú zĩteo.

² Fitila kũ teburu kũ òdi burodi kátea Ludanεεo kú kpéda kũ òdi pi gu kũ à kú adonan.

³ Kpéne kũ òdi pi Ludakuki pì kú lábure plade kpe.

⁴ A gũnn turaretitikpataki kũ ò pì kũ wurao kun kũ Luda bàka kunna kũńwo àkpati kũ wura kútea mámmamwo. Wura lo kũ mana kú a gũn kú àkpatii pìi gũn kũ Haruna gò kũ à lá bòtɔɔ pàao kũ Luda yãditena gbè anlonɔɔ.

⁵ Àkpatii pìi musu kerubu gakuridenɔn kú durun-nakẽmmakila. Pó pìno bɔkɔtena dodo gɔrɔn díro.

⁶ Nĩ katena le gũn, sa'orino òdi gẽ kpéda gũn gèn baaakɔ ò ní sa'ona zĩ ke.

⁷ Sa'oriki mé àdi gẽ kpéne wè do gèn do, akũsɔ àdi gẽ aru sariro. Àdi aru pì fãfã a zĩda durunna yã kũ a gbẽno pò kũ ò kè dɔnasarike gũnwo.

⁸ Luda Nini ten mɔwεε, gɔrɔ kũ kpé káaku pì kun, Ludakuki zé wẽnaro.

⁹ Abirekũ ten yã lekɔawεε kũ tera yão à pì, pò kũ donyĩrii òdi Luda gbanɔ kũ sa'opo kũ àdi kpáano òdi fɔ à a nèεε danε dokɔno swáswaro.

¹⁰ Yã ditena bi pìno bi mèbarayãme. Póble kũ pómínaao kũ gbàbona buri sĩnda pínkio yãme. Ò òdi ari zé dufu gɔrɔ gɔ káme.

Luda bàka kunna kũńwo dufu sa'onaa

¹¹ Akũ Kirisi sù yã mana kũ à kà tera sa'oriki ũ. À gẽ bizakuta kũ à zɔkɔ akũsɔ à papana de a káakupola gũn, kũ bisásiri mé à òro, andunia díkĩna pón sɔro.

¹² Àdi gẽ Ludakukin kũ blè ke zù aruoro, à gẽ kũ a zĩda aruo gèn dome, à gbẽno bò ari gɔrɔ sĩnda pínki.

13 Zaakū òdi blè aru kū zùsa aruo kū zùnunu kū ò kpàta túbuo fàfā gbē kū ò gbāsīnɔa ò gbà booñe,

14 oni Kirisi pò o dɔ yá? À a zīda kpà Ludaa mamberu sari kū Nini kū àdigō kun gɔɔ sīnda pínki gbānao. A aru di ó swè pípiwεε bona yā pā kekεna pìnɔ gūn, de ò zī ke Luda Wèndidenε.

15 Abire yāi Kirisi mé à Luda bàka kunna kūñwo dufu yākekεri ũ, de gbē kū Luda n sísino wèndi kū àdi lákaro kū à a lé sè le yāi. À gà de à n bo, à taari kū ò kè Luda bàka kunna kūñwo káakupɔ yā musunɔ kēm̄ma.

16 Tó ò ye ò zī ke gbē légbeditεnaaa, sé ògō dō sānsān kū ade gà,

17 zaakū ga gberan légbεε digō gbāna vī. Tó légbeditεri kpé bēne, légbε digō gbānaro.

18 Abire yāin odi Luda bàka kunna kūñwo káakupɔ pì sa ke aru sariro.

19 Kū Musa doka yāditenanɔ ò gbē sīnda pínki wára, à sākā tēra zónzon kū sēsōvlāoo sè à zō zūsane bòɔ kū blèkofīni aru kū ò yākatε kū íooa, à fàfā Musa dokaa kū gbēnɔo dɔ n pínki

20 à pì, Luda bàka kunna kūñwo arun gwe, kū à dìtεáre à kūna.

21 Len Musa aru fàfā bizakutaa kū sa'ona zīkebɔnɔo dɔ pínki.

22 Doka gūn aru mé àdi gbà bo pò daside pínkine. Arukotεnaa sari durunnanɔ kēm̄mana kunlo.

Kirisi a zīda kpà sa'opɔ ũ durunna mīdena yāi

23 Zaakū à kō sio ò gbà bo pò kū ò kú ludambε taka pìnɔne lán abire bà, sa'opɔ kū à de abirekūla kō sī kū ludambε pò pìnɔ.

24 Zaakū Kirisi dí gē Ludakuki taka kū bisāsiri bònlo, à gè a yápuran ludambeme, gu kū à kun tera ó Zekūnwode ũ Luda are.

25 Sa'oriki dì gē Ludakukin kū pókāde aruo wè kū wèeo, ama Kirisi dí gē de à a zīda kpá gèn baaakō yāiro.

26 Tó adi ke lero, de àten wari ke gèn baaakō zaa anduniakatena goroa. Yápura gūn à sù gèn dome goro kū andunia kà a kákia sà, à a zīda kpà sa'opo ũ, de à durunna mì deo.

27 Luda dìte bisāsirine à ga gèn do, gbasa à yákpate ke kāao,

28 Ien Kirisi a zīda kpà gèn do le, à gbēno durunna dì a mīa dasi. Ani era à su a gèn pladeo, adi ke durunna yāin doro, de à gbē kū n wé doino sura ba yāime.

10

1 Musa doka bi yā mana kū àten su takame, adi ke yā piinlo. Abire yāi sa dokōno pì ona gèn baaakō wè kū wèeo dì fō à gbē kū òten na Ludaino ke papana zikiro.

2 Tó sa pì onaa gbà bò donyīrinone gèn do ari goro sīnda pínkime yā, de n kù gbāna, ò a onaa tò.

3 Yápura gūn sa'onaa pì mé àdigō gbēno durunna yā doṅgu wè kū wèeo.

4 Zaakū zūsa kū blèkofīnioo aru dì fō à durunna kēmma zikiro.

5 Abire yāi kū Kirisi ten su andunia gūn, à pì Ludane:

N ye sa'opo ke gbairo,
akū n bisāsiri mēe kēmenē.

6 Sa'opɔ kũ òdi ká tén à té kũ
kũ sa'opɔ kũ òdi o durunna yã musuo
dì kánguro.

7 Akũ ma pì: Makũme la!

Lákũ ò kè takadan ma yã musu nà
ma su n pɔyenyĩna kemε, Luda.

8 Káaku gĩa à pì, sa'ona kũ gbao kũ sa kũ òdi ká tén
à té kũo kũ sa kũ òdi o durunna yã musuo dì ká
Ludaguro, à yeiro, bee kũ doka mé à dìte.

9 Akũ à pì, akãame dí, a su a pɔyenyĩna kemε. À a
káakupɔ kpà kpado a plade ditena yã.

10 Luda pɔyenyĩnaa pì kenaa gũn Yesu Kirisi a zĩda
kpà sa'opɔ ù gèn do, à tò ó kú adona Luda gbẽno ù.

11 Gɔɔ sĩnda pínki sa'orino dìgɔ kú n zĩ gũmme,
ògɔ sa dokɔno kũ àdi fɔ à durunna kẽm̃ma zikiro o
gèn baaakɔ.

12 Kirisi sɔ, à sa ò durunna yã musu gèn dome ari
gɔɔ sĩnda pínki, akũ à gèε à vùte Luda oplai.

13 Zaa gɔɔ kũa à kú gwe, àten dã Luda a ibereno
keare a tintin ù.

14 Zaakũ sa'ona gèn do pìi gũn, à tò gbẽ kũ à gbà
bònnenɔ gè papana ari gɔɔ sĩnda pínki.

15 Luda Nini èra àten yã pì owere do à pì:

16 Ma bàka kunna kũnwo gɔɔ bireno gbera yãn dí:
Mani ma dokayãno dañe n nèseε gũn,
mani kè n swèεa.

17 Akũ gbasa à pì:

Mani n durunna kũ n taarinɔ yã da doro.

18 Lákũ à n durunna kẽm̃ma nà, sa'ona n yã zé vĩ
doro.

Ò na Ludai

19 Abire yāi ma gbēno, kū Yesu aru gbānao ó gēna Ludakukin zé vī kū swèeo kpatena.

20 À wèndi zé dufu bòwèrè a mèe gāi à gè kūoo lábure kpè ari Ludakukia.

21 Lákū ó sa'ori zókō vī nà Luda onkūri ũ,

22 ò na Ludai kū nèse doo kū a náanikena sikaa sario kū swè kū ò pìpi ò taari laasun bò a gūnwo kū mè kū ò a zú ò kū í swáswao.

23 Ògō tāmāa kū o zèo kūna gíngin, zaakū Luda a lé sè, akūsō à náani vī.

24 Ò laakari dokōa, ò té kákōgu yenyī kū yāmanakenāao yā musu.

25 Òsun pā kpá ó kōkakaranaai lákū gbēkeno dì ke nàro. Ò lé dakōa, atēnsa lákū a è Dikiri sugoro ten ká kāni nà.

26 Tó o yāpura mà o dō, tó o gi óten durunna ke, sa'ona kū ani durunna kēwá kun doro.

27 Pó kū à gōwèrè mé à de ògō wé do yākpatei ũ kū swèkēnguo kū té gbāna kū ani Luda ibèreno kakateo.

28 Òdi gbē kū à gi Musa doka dai de a wé gwanaa sari gbēnon pla ke aakō sèedakpanaa musu.

29 Tó gbē gèserè pète Luda Néa, akū à Luda bàka kunna kúnwo aru kū à gbà bòare gya bò, akū à Nini Gbēkekenneri sōsō, àgō dō kū a wétamma nigō zókō de abirekūla manamana.

30 Zaakū ó yā díkīna òri dō à pì, akāa mé áni fīna bońma, akāa mé áni fīna bońne. Ò pì do, Dikiri ni yākpate ke kū a gbēno.

31 Yā pāsīme, tó n lète n da Luda Wèndide oĩ.

32 À laasun lé á kunna yāa. Á wékēnaa gbera a

wari fṣ́ á ɔsi zṣ́kṣ́ kanaa gūn.

³³ Zīkenɔa òdi á sṣ́sṣ́, òdi á wé tã pari gūn. Zīkenɔa adì zε kũ gbē kũ òteni wé tã lenɔ.

³⁴ A purusunano wēnda dṣ́. Kũ ò á póno siáwa, a we kũ ponnao, zaakū á dṣ́ kũ á aruzεε mana kũ anigṣ́ kun gɔro sīnda pínki vī.

³⁵ Abire yāi àsun tó á wórɔgɔ kũ à àre vīáre zṣ́kṣ́ gēteáwaro.

³⁶ Séde àgṣ́ mena vī de à pó kũ Luda a lé sè le a poyenyīnakenaa gbera.

³⁷ Zaakū à gṣ́ fítimε, ani gí kero, kũ gbē kũ àten su ni kipa.

³⁸ Gbē mana nigṣ́ kun ma náani kũ àten kε yāi, ama tó à èra kpε, ma pɔ nigṣ́ nnaro.

³⁹ Gbē kũ òdi boru kũ kpεo ò n zīda kakatenɔn ó ũro. Gbē kũ ò Luda náani kè ò surabanaa lènɔn ó ũ.

11

Gbē káakunɔ ludanaanikεnaa

¹ Ludanaanikεnaame támaa kunna Luda kīnaa sika sari ũ, yā kũ òdi wé sialero sina yápura ũ.

² Gbē káakunɔ ludanaanikεna mé à tò Luda n sáabu kpà.

³ Ó ludanaanikεna mé à tò ó dṣ́ kũ a yā'ona mé à andunia kàte. Pó kũ òdi wé sialeron à pó kũ òdi wé sialε kèo.

⁴ Habila ludanaanikεna mé à tò a sa'ona Ludaa mana de Kainu póla. A ludanaanikεna yāin Luda a sáabu kpà, à a òte gbē mana ũ, akū à a gba si. Bee kũ à gà, ó kpé óteni a yā ma Luda náani kũ à kèε pì yāi.

⁵ Enɔku ludanaanikεna mé à tò Luda a sè, de àsun garo yāi. Odi a e doru, kũ Luda a sè bona andunia

gūn yāi. Ari Luda gō a sé, à a sáabu kpà, à pì a yā kàagu.

⁶ Gbēke yā dì ká Ludagu a náanikēnaa sarīro. Séde gbē kū àten nai sí kū à kun akūsō àdi fīna bo a ki weterinone.

⁷ Kū Luda lé dà Nuhua yā kū odi e yāro musu, akū à Luda náani kè, à a yā mà, à gó'ite kè, à a ondeno sura bāo. A ludanaanikēna mé à tò yā vūte andunia, akūsō Luda tò yā bò kāao nna a náani kū à kēe pì yāi.

⁸ Kū Luda Ibrahī sisi de à gé būsū kū áni kpáa àgō vī gūn, akū Ibrahī Luda náani kè, à Luda yā pì mà. À bò be, bee kū à gu kū àten gén pì dōro.

⁹ À Luda náani kè, akū à be pēte bizakuta ū būsū kū Luda a lé sēneē pì gūn nibo ū. Len Isaaku kū Yakubuo do, zaakū Luda lēsenaa pì gō ní pō ūme.

¹⁰ Zaakū wēte kū Luda kàte à bò a zīni petēnaan Ibrahī wé do.

¹¹ Sara ludanaanikēna mé à tò à zé lè à nò sī, bee kū paramē, akūsō à zī kū, zaakū à dō kū Luda kū à lé sēare náani vī.

¹² Bee kū à zī kū, gōgbē mèn do pì buri kè dasi lán susunenō ke ísirale būsū'atē bà, oni fō ò a lé dōro.

¹³ Gbē pìno gāga ní pínki ní ludanaanikēnaa gūn, pō kū à a lé sēnēno lenaa sari. Ò è zà dire ò gbānake kpai. Ò pì, nibo bōasunōme ní ū zītea la.

¹⁴ Gbē kū òdi o leno ten mōwere kū òteni ní zīda būsū ni demē.

¹⁵ Tó būsū kū ò bòn begen òten ke yā, de ò zé lè ò èra ò tà gwe.

¹⁶ Ama būsū kū a mana de abirekūlan òteni a ni de, akū ludambe pō ū. Abire yāi tó ò Luda sisi ní

Luda ũ, àdi kenε wé'iyā ũro, zaakū à wéra kàτε ní pó ũ.

17-18 Kū Luda Ibrahĩ yò à gwà, akū Ibrahĩ Luda náani kè, à Isaaku kpà sa'opɔ ũ. Luda lé sènε yā à pì, Isaaku burinɔn onigɔ piñne a burinɔ ũ. Bee kū abireo à zè kū a né mèn do pì kpanaao.

19 À sì kū Luda gbāna ni fɔ à gènɔ vu bona gan, akū à de lákū ò pì à èra à Isaaku lè bona gan bà.

20 Isaaku Luda náani kè, akū à sa'ole kè Yakubu kū Isauonε.

21 Kū Yakubu kú ga léi, akū à Luda náani kè, à sa'ole kè Yusufu nénɔnε, akū à gbāna lè a gòoa à donyĩ kè.

22 Kū Yusufu kà gana, akū à Luda náani kè, à Isarailanɔ bona Misila yā ò kū lákū oni ke kū a gèwao nà.

23 Musa de kū a dao Luda náani kè, akū ò a ùτε ari mɔ aakɔ a inaa gbera, kū ò è a àlesi mana yāi. Odi vīna ke doka kū Firi'auna ditenεro.

24 Kū Musa kè zɔkɔ, akū à Luda náani kè, à gì ò a sísi Firi'auna nénɔgbē né ũ.

25 À sì ò a wé tā kū Luda gbènɔ de kunna kū pɔnnao durunna gūn gɔrɔ plala.

26 À ditenε kū wé'i kū òdi damma Kirisi yāi de Misila aruzekela, zaakū ziakezi láadan a wé kúa.

27 A ludanaanikena mé à tò à bò Misila, adi vīna ke Firi'auna pɔfēnεro, à zè gíngin lákū à Luda kū òdi e kū wéoro èe bà.

28 A ludanaanikena mé à tò à Vīnla dikpe ditenε kū aru mamana kpé lé gbàiao, de gbēderi sún ɔ na ní daudunɔaro yāi.

29 Isarailanɔ Luda náani kè, ò bikū Isira Tēraa lán zīte kori bà. Kū Misilanɔ yò a le, akū í dànía.

³⁰ Isarailano Luda náani kè, ò táa ò ò lika Yerikoi ari goro suppla, akū a bīni kòte.

³¹ Karua Rahabu Luda náani kè, à gu'asirigwarino dìte à n gwá manamana, akū adi kakate kū ludayādarisarinoro.

³² Mani pi dera doo? Mani zé le mà Gidion yā oro ke Baraki ke Samusi ke Yefeta ke Dauda ke Samueli ke annabinoo.

³³ Ò Luda náani kè, akū ò zīi blè kínanoa, ò yā gōgō gbēnoe a zéa, ò lé kū Luda sēne gbèe lè, ò músuno lé nākōa,

³⁴ ò té pāsī dè, ò bō fēneda léi, ò gbāna lè n gbānasarike gūn, ò pāsī kù zīi gūn, ò pè buri pānde zīkarinoa,

³⁵ ò nōgbēno né gēno fūte bona gan ò kpàmma. Ò mēe ù n gbēkenoa, akū ò gi ò n gbarē, de ò vu bona gan ò bo mana yāi.

³⁶ Ò n gbēkeno fobò, ò n gbē kū flāao. Ò mōo kà n gbēkenoa, ò n ká kpésiran.

³⁷ Ò n pápa kū gbēeo ò n dede, ò n zōkōre pla kū sàkasakaa, ò n dede kū fēneda. Ò kurè sā bára kū blè bárao dana. Ò gō kori, ò n wé tã, ò wari dōmma.

³⁸ Andunia kunna dí kō sí kūńworo. Ò likaralikara sēn kū kpi musunoo, ò kú gbēweeono kū tōnoweeono.

³⁹ Bee kū Luda gbē pino sáabu kpà n pínki a náani kū ò kè yāi, odi pō kū à a lé sēne lero,

⁴⁰ Luda gīnake à dìte, ò gwena mana le de n póla, de òsungō papana ó sariro.

12

Luda a gbēno totonaa

¹ Abire yāi ókōnō se, lākū sèedadenō diwái nà ɛ, ò ɔ kpá pó kū òdi kpáwɛɛnɔi kū durunna kū àdi ó kakūn aragao pínki, ò bàkpakūsūna kū Luda dītɛwɛɛ lé kū menao.

² Ó wé pé Yesua kū à bò kū ó ludanaanikɛna zéó akūsō à zé pìi kè papana. À gana líaa fò, adi a wé'iyā daro ponna kū à ditenanɛ lena yāi, akū à gɛɛ à vùtɛ Luda kíblegba ɔplai.

³ À laasun lé a yāa, lākū à mena fò kū durunnakeri kū ò ibɛɛ bire taka sè kãaonō, de àsun kpasá á nɛɛɛ yakaro yāi.

⁴ Zaakū á ɔsikana kū durunnaoo gūn, ádi zɛ a gi ari a gɛ a gaoro.

⁵ Nèseyĩdakūna yā kū ò òáɛ lán nénō bà sãágun yá? Ò pì:

Ma né, tó Dikiri teni n toto, ñsun dītɛ pãro.

Tó à kpàkɛnyĩ, ñsun tó n kã garo.

⁶ Zaakū gbɛ kū Dikiri yeiin àdi toto,

àdi wé tã gbɛ kū à sì a né ũa.

⁷ À wétamma dītɛ totona ũ. Luda mé àtɛn abirekū kɛáɛ, kū a nénōn á ũ yāi. Né ke kun kū a de ni gí à a totoi yá?

⁸ Tó adi á toto lán a né kparanō bàro, á de a nénō ũro, yìgisarinɛnōn á ũ.

⁹ Ó denō vī andunia la kū ò ó toto, akū o n yā mà. Lākū à de ɛ nà, ò mì natɛ ó De kū à kú musu de abirekūla ògō kun.

¹⁰ Ó denō ó toto gɔrɔ pla pó ũ n ñndō lén. Luda dì ó toto ó karana yāimɛ, de ó kunna le àgō adona lán a bà.

11 Totona ke ponna vī a goroaro, sé pōsira, ama gbē kū totonaa pī n kékēno dī a gbè le zā bona mana kū aafiao ū.

12 Abire yāi à á o kū ò gè doáino kū á gbá kū ò gè tererenō gba gbāna,

13 à zé sé súsu, de ákōno kū áten tōtēno sún kakūnlo, ò gō kū aafiaao.

14 À wete agō nna kū gbē sīnda pínkio, á kunna gō adona, zaakū tó gbē kunna adonaro, ani Dikiri ero.

15 À laakari ke, á gbēke sún kura Luda gbēkekennenaai à gō gōnna ū á té, à wari do gbēnoa dasi à n yakaro.

16 Á gbēke sún gō de pāpākeri ke ludayādarisari ū lán Isau bāro. Á a daudukēze yā pō gēn do blena yāi.

17 Á dō kū à sa'ole wete a dea zā, akū Luda gīne. Bee kū à wete kū wé'io, adi zé le à yā kū à kè litero.

Luda bàka kunna kū'wo zī kū a dufuo

18 Adi ke Sinai kpi kū oni fō ò o naaan a nairo, kū áten té kū, à gusira vī kū gu bùgubuguuo kū zàga'iao

19 kū kākāki yīsāmpanaao kū Luda kōto gbānao. Kū Isarailano kōtoo pīi mà, ò kúte kēne ò pī, àsun yāke oñne dorō,

20 zaakū oni yā kū à dīteñne dīkīna fōro à pī: Bee pōkāde mé à nā kpi pīia, ò pápa kū gbēeo ò de.

21 Luda kipanaa pī bi vīna yāme manamana ari Musa pī, vīna a kū, áten lukaluka.

22 Ama a na Zaiō kpii kū Luda Wēndide wete Yurusalemu kū à kú musuo kū a malaika dasidasi kū ò kakarana gweno

23 kũ daudu kũ ní tó kēna gwenɔ kōkakaranaao kũ Luda kũ à de gbē sīnda pínki yākpatekeri ũo kũ gyāwān gbē mana kũ ò g̃ō papanano

24 kũ Yesu kũ à de Luda bàka kunna kũnwo dufu yākekeri ũo kũ a aru fāfāna kũ àten yā mana o de Habila pólao.

25 À laakari ke, àsun gí yā'orii pì yā mairo. Lákũ gbē kũ ò gí Luda lédamma mai zīte lanɔ dí boro nà, ókōnɔ se, lákũ Luda ten lé dawá zaa musu, tó o kpe līne, oni ó pó o dɔ yá?

26 A kòto zīte lùkaluka yā, akũ à lé sè à pì, áni gu lukaluka gèn do dɔ, adi ke zīte adonlo, kũ musuome sà.

27 Kũ à pì, gèn do dɔ, abirekũ ten piwεε Luda pókεna kũ ani lukaluka pìnɔ ni gē zélame, de pó kũ àdi lukaronɔ le àgō kun.

28 Abire yāi lákũ óten kpata kũ àdi yīgāro ble nà, ò Luda sáabu kpá, ògō donyī keεε lákũ à yei nà, ògō mì natεε vīnakenanεε gūn.

29 Zaakũ ó Luda bi té kũ àdi kũmame.

13

Lédammanaa

1 À wé tā àgō gbēke vī kũ kōo.

2 À laakari dɔ nibɔkūnaaa, zaakũ len gbēkeno malaikanɔ yārīi kè dōnaa sari le.

3 À tó gbē kũ ò ní ká kpésira gūnnɔ yā dɔágu, lákũ á kú kũnwo kpésiran bà, kũ gbē kũ òten wé tāmmanɔ, lákũ ákōnɔme òten wé tāáwa bà.

4 Baadi gō nɔsena da yā bèεεde ũ. Òsun ní wúteki gbāsī kpáro, zaakũ Luda ni yākpate ke kũ zinakerinɔ kũ pāpākerinɔ.

⁵ Yena ɔɔi sún doáre arero. À ze kũ pó kũ á vĩo, zaakũ Luda pi:

Mani n tónlo,
mani pã kpányĩ zikiro.

⁶ Abire yãì odi kùgbãna ke ò pi:

Dikirime ma kpanyĩri ũ,
vĩna ni ma kũro.
Bón bisāsiri ni f̄s̄ à kemenee?

Sa yãpura onaa

⁷ À tó á don'arede kũ ò Luda yã òárenɔ yã dɔágu. À n̄ kunna tàasi ká ari a léa, á Luda náani ke lán n̄ bà.

⁸ Yesu Kirisi dokɔnɔ gĩa kũ gbãrao ari ɔɔɔ s̄inda pínki.

⁹ Àsun tó ò á s̄ate kũ yã nibɔ dasi dannenanɔoro. À mana ó swè gbãna le Luda gbẽke gũn, adi ke sa'opóble kũ àdi àre ke ke gbẽ kũ ò zèonɔneronlo.

¹⁰ Bizakuta sa'orinɔ zé v̄i ò sa'oki kũ ó v̄i póble blero.

¹¹ Sa'oriki dì gẽ Ludakukin kũ pókãde aruo durunanɔ k̄emmana yãì, akũ òdi a gè kpata bùra kpe.

¹² Abire yãì Yesu gà w̄ete kpe se, à gbà bò gb̄enɔne kũ a z̄ida aruo.

¹³ Ò bo ò gé a k̄inaa bùra kpe, wé'i ó kũ k̄aao se.

¹⁴ Zaakũ ó w̄ete kũ aniḡo kun v̄i laro, w̄ete kũ àten sun ó wé d̄i.

¹⁵ Abire yãì òḡo Luda sáabu kpá lakanaa sari kũ Yesu gbãnao ó sa'ona ũ. Gba kũ a s̄isirinɔ dì suon gwe.

¹⁶ À laakari dɔ yãmanakena kũ k̄ogb̄ek̄enaaoa. Sa bire taka ona mé àdi ká Ludagu.

17 À á don'arɛdenɔ yā ma, à mì nateíne, de ò le ò zī ke kũ pɔnnao, zaakũ ò de gbē kũ oni n zī yā baba Ludanɛnɔ ũ. Tó òten zī ke kũ lésuruo, ani àre kéáero.

Lézammanaa

18 À adua kéwɛɛ. Yáke teni ó swè vīro, odigō ye ògō kú ó dɔrɔɔa yā sīnda pínki gūn.

19 Ma wé kéáwa à adua kémenɛ, atɛnsa mà le mà su á kia likalika.

20 Luda aafiade kũ ó Dikiri Yesu fùte bona gan sādāriki ũ a bàka kunna kũoo gɔrɔ sīnda pínki aru gāi,

21 à á kéke kũ mana pínkio, de à a pɔyenyīna ke, à yā kũ à kàagu ke ó gūn Yesu Kiriisi gāi. Àkũ mé à gakuri vī gɔrɔ sīnda pínki, aami.

22 Ma gbēnɔ, ma wé kèáwa, àgō lédamma yā pì kũna kũ menao, zaakũ takada kũ ma kèáre zókōro.

23 Àgō dō kũ ò ó gbē do Timoti gbàre. Tó à kà la tera, óni su á gwa lɛɛɛ.

24 À fɔ kpá á don'arɛdenɔ n pínki kũ Luda gbēnɔ pínki. Itali būsudenɔ fɔ kpàáwa.

25 Luda gbēke kéáre á pínki.

Luda yá takada kú Bisá yáo
Portions of the Holy Bible in the Busa language of
Nigeria

copyright © 2005 SIM International

Language: Bisá (Busa)

Translation by: SIM

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-10-10

PDF generated using Haiola and XeLaTeX on 18 Apr 2025 from source files dated 31 Aug 2023

8631d380-7d17-5581-abf9-174814e8ccc3